

Monsieur Fernand Etgen
Präsident vun der Chamber

Lëtzebuerg, den 8. Januar 2021

Här Präsident,

sou wéi den Artikel 83 vum Chambersreglement et virgesäit, bieden ech Iech, dës parlamentaresch Fro un den Här Educatiounsminister weiderzeleeden.

Ab dem 11. Januar 2021 ginn d'Schüler an der Grondschoul an dem ënneschte Zyklus vum Lycée nees an der Schoul, a Form vu Presenzunterrecht enseignéiert. Salariéen par konter sollen, wann nëmme méiglech, weider vun der Méiglechkeet vum Homeoffice, also dem Télétravail profitéieren. Elo ginn et awer och vill Erwuessener, déi sech weiderbilden an zum Beispill Coursen vum House of Training, vun der Chambre des Salariés, vum Institut national des langues (INL) a vill anerer besichen.

An deem Zesammenhang wollt ech dem Här Educatiounsminister dës Froe stellen:

- Wéi gëtt d'Erwuessenebildung a Covid-Zäiten organiséiert?
- Op Säiten vum INL heescht et beispillsweis, dass d'Coursen en présence oder en alternance erëm den 11. Januar géifen ulafen, bis dohinner gouf op den e-learning gesat. Ass de Minister der Meenung, datt des Coursen weider sollen online gehale ginn, well hei vill Persounen aus den ënnerschiddlechste Beruffer, Secteuren a Géigenden zesummekommen?
- Ginn et an deem Sënn Virgaben oder Recommandatioune vum Educatiounsminister, en vue vun enger Reduktioun vun de soziale Kontakter?
- Ginn et Statistiken, wat d'Infektiounen an der Erwuessenebildung mam Covid-19 ugeet?

- Wéi gesinn d'Inscriptiounen fir déi jeeweileg Coursen aus? Huet de Covid-19 Auswierkungen op d'Nofro un Owescoursen a Weiderbildungen?

Mat déiwem Respekt,



Francine Closener
Deputéiert

Äntwert vum Minister fir Educatioun, Kanner a Jugend op d'parlamentaresch Fro Nr. 3408 vun der honorabeler Madame Deputéiert Francine Closener

Vu mengem Ministère si véier Servicer betraff, déi sech ëm d'Erwuessenebildung këmmere, an zwar:

- de Service de la formation des adultes (SFA),
- den Institut national des langues (INL),
- d'École nationale pour adultes (ENAD),
- de Centre national de formation professionnelle continue (CNFPC).

Ech beschränke mech bei den Äntwerten op déi dräi éischtgenannte Strukturen, well den CNFPC duerch seng Orientéierung an seng Organisatioun ganz ënnerschiddlech funktionéiert.

Ad 1)

Am Allgemengen huet den SFA fir seng eege Coursë festgehalen a seng Prestataire encouragéiert, eng Offer am Blended Learning, respektiv ganz am E-Learning unzebidden. Ongeféier 5% vun der Offer gëtt ganz am E-Learning ugebueden. Fir d'Intégration linguistique an der 2e voie de qualification ass fir dëst Joer de Choix geholl ginn, fir d'office am Blended Learning ze fueren. Dat huet et erméiglecht, méi kleng Gruppen ze maachen an d'Leit och direkt mat den Outils vum E-Learning ze familiariséieren am Fall vun engem weidere Lockdown. D'Instruction de base pour adultes gëtt a kleng Gruppen am Cours am Présentiel organiséiert.

Generell ginn d'Coursë vum INL ënnert strenge sanitäre Moossnamen esou normal wéi méiglech organiséiert, konkret heescht dat, datt all d'Coursen en présentiel gehale ginn, ausser de Pilotklassen (aktuell 35 Stéck) vum Blended Learning, déi en alternance online a sur place stattfannen. D'Gruppe sinn net gespléckt an d'Apprenantë si bei der Rentrée informéiert ginn, datt d'Coursë ganz normal am Kllassesall ofgehale ginn. Allerdéngs war de Port du masque direkt vun Ufank un obligatoresch an d'Apprenantë sinn a kleng Gruppen vu véier Persounen regroupéiert a jiddereen ass duerch Plexiglas eenzel vu sengem Noper ofgeschermt

An der ENAD fir d'Klasse vum DAES a vum Educateur (2GEA an 1GEA) gëtt mat A- a B-Woche geschafft, wou eng Woch op déi aner ëmmer een Deel vun der Klass present ass an déi aner à distance schaffen. Wat d'Klass vum Educateur 1+GEA betrëfft, sou gëtt do och mat A- a B-Woche geschafft, wou awer ëmmer eng Hallschent vun der Klass present ass.

Ad 2)

Am INL ginn d'Coursen esou laang wéi méiglech en présentiel gehalen, dat heescht, esou laang wéi déi sanitär Situatioun et erlaabt. An der éischter Schoulwoch Januar waren se à distance, wuerop d'Apprenanten och virbereet waren. D'Coursë goufen vum 11. Januar 2021 un nees sur place gehale respektiv am Blended Learning fir déi betraffe Klassen. Am Fall vun engem vulnerabele Student gëtt selbstverständlech E-Learning organiséiert.

Ad 3)

Et gëllen an éischter Linn d'Recommandatioune vun der Santé, dat heescht, do wou et méiglech ass, ginn d'Coursen à distance gehal, an/oder d'Klasse gi gespléckt, esou datt déi sozial Kontakter reduzéiert ginn. Wa Coursen en présentiel sinn, ass d'Droe vum Mask obligatoresch um ganze Site. De Flux vun den Apprenanten ass op all Site vun der Erwuessenebildung beschteens duerchstrukturéiert. Während dem Cours soll ee sëtzen, et gëtt stänneg geléift a gebotzt, an d'Ofstandsreegele gëllt et anzehalen.

Ad 4)

Beim SFA ginn et keng Statistiken, do ass zanter September just ee Fall an dem Grupp Instruction de base bekannt, wou an enger Klass zwou infizéiert Persounen waren, doropshin ass d'ganz Klass an den E-Learning geschéckt ginn. Bei der 2e voie de qualification sinn eng Kéier aacht Klasse fir eng Woch an den E-Learning gaang, well en Enseignant do positiv getest gouf.

Tëscht dem 1. Oktober 2020 an dem 15. Dezember 2020, goufen et um INL 170 Apprenanten, déi positiv waren an a Quarantän waren. Iwwert dee selwechten Zäitraum goufen et fënnf Fäll vun Enseignanten, déi positiv waren.

An der ENAD gouf et 24 Mol den Zenario 1, wou ee Schüler am Isolement war an de Rescht vun der Classe am éloignement an der Schoul, an ee Mol den Zenario 2, wou zwee Schüler an ee Professor am Isolement waren an de Rescht vun der Klass am Travail à distance.

Ad 5)

Beim SFA, an der Intégration linguistique ewéi an der 2e voie de qualification konnt ee keen Ënnerscheed par rapport zu viridrun feststellen. An der Instruction de base ass d'Demande vun neien Inscriptiounen während dem Confinement erofgaang, ass dono awer erëm an d'Luucht gaang a konstant bliwwen. An den Owescoursen (cours d'intérêt général) ass Zuel vun den Inscriptiounen ëm en Drëttel erofgaangen. Fir d'Offer an dem vum SFA konventionéierte Beräich hu mer nach keng Zuelen, well mer déi haaptsächlech verlässlech bei den Decomptë kréien. Dës Zuelen ënnersträichen d'Wichtigkeet vun der Erwuessenebildung, déi mer och, oder éischter grad a Krisenzäiten mussen, ënnert den appropriéierte Konditiounen a mat Hëllef vun den informatésche Medien, oprecht halen.

D'Aschreiwunge beim INL fir d'Sproochecoursë sinn och zimlech konstant bliwwen: 8.463 am Hierscht 2019 géint 8.320 am Hierscht 2020.

Bei der ENAD gëtt esouguer een Zouwuess bei dem DAES en alternance a beim Édicateur en alternance.